

ARLeF a Friuli Doc 2017

Une mostre a Palaç Morpurgo, un bancut cun materiâi informatîfs e doi apontaments tai spazis ERSA

Si rinove ancje pal 2017 la colaborazion de Agenzie Regjonâl pe Lenghe Furlane (ARLeF) cul Comun di Udin in ocasion di Friuli Doc, par dâ mût al public di cognossi i progjets plui resints de Agenzie che e tutele, e promôf e e valorize la lenghe furlane, intal contest de plui impuartante manifestazion enogastronomiche regjonâl.

Daspò Brussel, dulà che e je stade screade li dal Uffici di colegament de Regjon F-VJ, e dopo Teramo, Sapade (dulà che e je restade esponude in ocasion de Fieste de Patrie dal Friûl), Merêt di Tombe e Cormons, in ocasion de manifestazion la ARLeF e puarte a Udin la **mostre "Furlan, lenghe de Europe"**. Promovude de Agenzie e curade dal diretôr William Cisilino, e ilustre la storie, la culture, la comunicazion e la politiche linguistiche metude in vore intal teritori furlanofon de regjon e e sarà esponude a **Palaç Morpurgo, in Sale Valle** (oraris: joibe des 17.00 aes 20.00 – vinars, sabide e domenie des 10.00 aes 20.00). Propit devant di Palaç Morpurgo, la ARLeF e sarà presinte par ducj i dîs de manifestazion cul propri **bancut** dulà che a vignaran distribuîts **materiâi informatîfs, promoziônai e gadgets**, e dulà che si podaran otignî informazions sui tancj progjets de Agenzie.

A saran doi invezit i **apontaments a teme enogastronomic, programâts in graciis de colaborazion cun ERSA** e ducj i doi a vignaran fats propit tai spazis ERSA: vinars ai 8 di Setembar, des 12.45 aes 13.45 e vignarà **proponude "La cuisine des minorancis", une lezion di cuisine cun cercis**, insiemi cui cogos Maria Cernetig e Daniele Cortiula, **ae discuierte des tipicitâts furlanis**. Sabide ai 9, cun orari 12.00-13.00, li dal **Spazi Fruts, apontament invezit pai plui piçui cu la leture animade de flabe "Il Diaul e la Gubane"**.

«Se Friuli Doc al rapresente une vetrine straordenarie pes ecelencis dal teritori – al sclaris il president de ARLeF, Lorenzo Fabbro -, chest al è vêr no dome pe enogastronomie ma ancje par promovi la nestre ricjece culturâl: la pluralitât linguistiche dal Friûl no je une carateristiche secondarie ma, al contrari, e rapresente un segn culturâl unic, prezios e indivisibil par relacionâsi e promovi la nestre tiere a 360 grâts».

In plui de organizazion dai bancuts, la ARLeF e à garantît al Comun la presince de comunicazion plurilenghâl midiant da so servizi di traduzion in lenghe furlane. A fevelaran in **marilenghe** no dome i **materiâi promoziônai di cjarte** ma ancje il **sît internet** de manifestazion.

Udin, ai 30 di Avost dal 2017

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**
Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<